

四庫全書

集部

欽定四庫全書

石倉歷代詩選卷一百七十四

明 曹學佺 編

宋詩五十一

范成大

過平望

寸碧闊高浪孤虛明夕陽水楊搖病綠霜蒲蘸新黃孤
嶼作舉網蒼烟忽鳴榔波明荇葉顫風熟蘋花香雞犬

散村落萼鱸近江鄉野寺對客起樓陰濯滄浪古來離
別地清詩斷人腸亭前舊時水還照兩鴛鴦

蜀州西湖

閒隨渠水來偶到湖光裏仍呼水月舟徑度雲錦地誰
云不解飲我已荷香醉湖陰玉嬋娟竄立紅妝外何須
東閣梅悠然自詩思驚風入午暑水竹含秋意采菱不
盈舸興與萼鱸會遙知新津宿魂夢亦清麗

九月三日宿胥門始聞雁

故人久不見乍見難悲喜新雁如故人一聲驚我起把
酒不能觴送目問行李曾聞行路難空濛千萬里塞北
多關山江南渺雲水風高吹汝瘦旅伴今餘幾斜行不
少駐減沒蒼烟裏羈遊吾亦倦客程殊未已扁舟費年
華短纜繫沙尾物生各有役冥心聽行止江郊匝地熟
場圃平如砥歸期且勿念共飽豐年米

曉出古城山

落月墮眇莽殘星澹微茫竹輿亂清溪飛蓋入嵐光松

檜霧靄濕桑麻風露香空翠滴塵纓何必濯滄浪山家
亦早作迨此朝氣涼林深無人聲木末炊烟蒼離離瓜
芋區蕭蕭棗栗場田園古云樂令我思故鄉墟市稍來
集筠籠轉山忙吏事亦挽我歸路盤朝陽

臨溪寺

萬山繞岭嶺二水奔瀕洞亭亭林中寺金碧粲欄棟解
鞍得蒲團卧受瓦爐供少捐一炊頃暫作百年夢無人
自驚覺幽禽正清哢倦客如殘僧無力供世用此行端

為山紫翠迭迎送漱井出門去驚塵撲飛鞚

盤龍驛

聞雞一唱罷占斗三星沒天高月徘徊野曠山突兀
暗蛩泣草露怨亂語還咽涼螢不復舉點綴稻花末
惟餘絡緯豪悲壯殷林樾小蟲亦何情孤客心斷絕
魂驚板橋穿足側石川滑行路如許難誰能不華髮
高城漫回首疊嶂屹天闕遙知秋衾夢千里一飄忽

寒亭

溝塍與澗合隴畝抱山轉向來六月旱此地免焦卷早
穗已垂垂晚苗猶剪剪一川豐年意比屋開雞犬老農
霜鬢須矍鑠黃犢健自云足踏地常賦何能免刈熟倩
人輸不識長官面康年無復事但恐社酒淺我亦有二
頃收拾尚可繭懷哉笠澤路歸鋤犁頭蘚

隱靜山

五峯抱巖扉千柱奠雲壑荒原最爾縣有此寶樓閣維
昔經營初衣錫化雙鶴杖頭具隻眼矯矯雲中落尊者

一笑許璇題照林薄庭栢有祖意石泉韻天樂清簧轉
碧雞飛梭擲蒼鵲號風飢虎怒失木啼猿愕英遊偶然
同吏檄乃不惡題名記吾曾醉墨疥丹堊

新館

露稻粘明璫風茅滾高浪荒烟暗白道行行亂蛩響日
脚午未吐雲頭晚猶漲欣此半日涼籃輿走清曠病客
不堪暑茲行天肯相蚤蚤掃無跡秋意滿千嶂稍尋泉
石盟畧褫簿書障鵲原定相念因風報無恙

寄題向撫州采菊亭

一葉起秋色衆綠凋歲華耿耿霜露餘卜此黃金葩西
風滿天地孤芳照塵沙慙慙開小築花氣日久嘉落英
楚纍手東籬陶令家兩窮偶寓意豈必真愛花不如亭
中人一笑了天涯采采勿虛度門前欲高牙

古風上湯丞相

抱琴遊孔門豈識宮與商古曲一再行乃雜巴人倡知
音顧之笑解絃爲更張歸來掩關卧冰炭交愁腸平生

桑濮手未省歌虞唐明發理朱絲復登君子堂遺音入
三歎山高水湯湯

刺瀆淖

瀆淖盤渦之大者峽江水壯則有之或大如一間屋
相傳水行峽底遇暗石則瀆起已而下旋為窩然亦
未嘗有定處或無故突然而作巨測也舟行遇水小
則歌傾大則與齧俱入險惡之名聞天下

峽山饒暗石水壯日千變不愁灘瀧來但畏瀆淖見人

言盤渦耳夷險顧有間仍于非時作未可一理貫安行
方熨敵無事忽翻練突如湯鼎沸翕作茶磨旋勢迫中
成窪怒霽外始暈已定稍安慰儵作更驚眩漂漂浮沫
起疑有潜鯨噴勃勃駭浪騰復恐蟄螯扑篙師瞪褫魄
灘戶呀雨汗逡巡怯大敵勇往決鏖戰幸免與齊入還
憂似蓬轉驚呼招竿折奔棹竹竿斷九死船頭爭萬苦
石上牽旁觀兢薄水撇過捷飛電前余叱馭來山險固
嘗徧今者擊楫誓豈復憚波面澎澎三峽長颭颭一葦

亂既微掬指忙又匪科頭慢天子賜之履江神敢吾玩
但催疊鼓轟往助雙擄健

中巖

赤巖倚玲峴翠邏森戍削岑蔚嵐氣重稀間暑光薄聊
尋大士處往叩洞門鑰雙撐紫玉闕中轟翠雲幄應供
華藏海歸坐寶樓閣無法可示人但見雨花落不知龍
湫勝何似魚潭樂夜深山四來人靜天一握驚看松桂
白月影到林壑門前六月江世界塵漠漠寶餅有甘露

一滴洗煩濁捫天援斗柄請為諸君酌

鐸觥

弔史祿祠因懷李師中

導江自海陽至縣廼瀾迤狂瀾既奔傾中流遇鐸觥分
為兩道開南灘北湘水至今舟楫利楚粵徑萬里人謀
敘天造史祿所經始無謂秦無人虎鼠用否耳紫藤纏
老蒼白石溜清泚是聞可作社牲酒百世祀脩廢者誰
歟配以臨川李

秋日雜興

夕陽下桑柘餘暉挂西山
西山在何許冉冉紫翠間
綵雲無朝昏綠蘿竟暄寒
昔與霞上人同跨雙飛翰
上凌紫霄峰下弄白石湍
風吹墮眇芥及此行路難
佳人應望余興宣直忘還

寒食郊行書事二首

野店垂楊步荒祠苦竹叢
鷺窺蘆箔水鳥啄紙錢風
媼引濃妝女兒扶爛醉翁
深村時節好應為去年豐

隴麥欣欣綠山桃寂寂紅
帆邊漁斲浪木末酒旗風
信

步隨芳草迷途問小童賞心添脚力呼渡過溪東

宿義林縣院

暝氣昏如雨禪房冷似水竹間東嶺月松杪上方燈驚
鵲盤金剎流螢拂玉繩明朝窮脚力連夜斬崖藤

十月朔客建鄴不得兄弟上冢之列悲感成詩
歲已看成暮身今未得歸風塵孤淚盡霜露寸心違南
碕新流水西山舊落暉烟松應好在宿草定成非遊水
方東去浮雲浪北飛危魂先自斷不待更沾衣

擬古

彎環樓前月掩仰樓上人
人月不得語相看兩凝顰
西窓回紋機織徧金字春
聊可自持玩何由將寄君

春思

沙際萊蘋滿樓前芳草多
光風入網戶羅幕生繡波
前年花開憶湘水去年花
開淚如洗園樹傷心三見
花依舊銀屏夢千里

田舍

呼喚携鉏至安排築圃忙兒童眠落葉鳥雀噪斜陽烟
白村聲遠林青野氣香樂哉今歲事天末稻雲黃

夜發崑山

歲寒人墜戶霜重獨登舟弱櫓搖孤夢疎篷蓋百憂但
吟今不樂寧計幾宜休漸愧沙湖月年年照薄遊

清明日狸渡道中

灑灑霑巾雨披披側帽風花然山色裏柳卧水聲中石
馬立當道紙鷲鳴半空墻間人散後鳥鳥正西東

次韻溫伯城上

閉戶成癡坐扶藜得意行樓臺浮霽色市井碎春聲雪
盡小橋出烟消千嶂生病多無脚力遙羨落鴻輕

湘潭道中詠芳草

積雨倏然晴秀野若新沐芳草徑寸姿中有不勝綠萋
萋路傍情頗亦念幽獨驅馬去不顧腸斷招隱曲

耳鳴戲題

歷歷從何起泠泠與耳謀人言衰相現我以妄心求遠

磬山房夜寒蛭隴樹秋圓通無別法但自此根脩

安鄉縣西晚泊

水濶烏鳥倦墟寒童僕飢一灣村縣過百折暮江遲曉
夢孤燈見春陰病骨知簡書寧不畏旅食奈先疲

火墨坡下嶺

清晨入岑蔚嵐重寒颼颼忽聞黃鸝語方悟麥始秋旅
食法當瘦遠行人所愁况復深山中不與叶氣遊苦辛
那敢憚病悴良可憂徒憂亦無益聊作商聲謳

秭歸縣

永日貪程客長年弔古詩悲秋荒古宅負石慘空祠峻
壁鴉翻倦高畬麥秀遲窮山熊繹國偏仄建邦時

蟠龍嶺

夷陵至胸臆複嶺如絲亂初程尚勇往少日還委頓安
得長劍揮盡剷疊嶂斷雖云北山愚聊快南溟運此意
竟蕭索勞歌謾淒曼日日望平陸方為到彼岸

其二

人言束馬險但欠蟠龍峻推頽强弩末閔勉焚舟戰譬
如已償逋猶有未折券山根治曉裝峰頂寄朝飯稍脫
虬瘴染還探虎窠玩性命及可憂筋力何足算

金山嶺

阪峻身頻偃崖深首屢回雲浮平地出路拂半天來但
指關山過都忘歲月催湘南初上馬猶挿早春梅

巴蜀人好食生蒜臭不可近頃在嶠南其人好
食擯榔合蠣灰無留藤一名蔓藤食之輒昏

然已而醒快三物合和唾如膿血可厭今來
蜀道又為食蒜者所薰戲題

旅食諳殊俗堆坪駭異聞南食仄薦蠅已饌菜先葷幸
脫蔓藤醉還遭胡蒜薰絲萼香味好歸夢水連雲

題戲索橋

織簾勻鋪面排繩疆架空染人高曬帛獵戶遠張罾薄
薄難承雨翻翻不受風何時將蜀客東下看垂虹

新津道中

雨後郊原淨村村各好音宿雲浮竹色清溜走檀陰曲
沼擎青蓋新田藝綠針江天空濶處不受暑光侵

長風沙

夕陽明遠帆高浪兀孤嶼綿綿淮山來閃閃沙鳥去落
木雨三家炊烟南北渡眉伸擊汰行夢愕阻風處

上方寺

樣棹古銷夏檣筇新上方珠灣鋪圓折水鏡沈空光楓
纈醉晴日摘黃明早霜間門松竹逕隨處有清涼

浙東舟中

處處槿樊園家家桃廡門魚鹽臨水市烟火隔江村雨
過張帆重潮來汲井渾彎跼短篷底休說兩朱轡

春晚即事留游子明王仲顯

繡地紅千點平橋綠一篙棟花來石首穀雨熟櫻桃笑
我生塵甑慙君着緼袍故人能少駐門徑久蓬蒿

道中

月冷吟蛩草湖平宿鷺沙客愁無錦字鄉信有燈花蹤

跡隨風葉程途犯斗槎君看枝上鵲薄暮亦還家

晚春

靜極聞簷珮慵來愛枕幃隙虹飛水畫簾影碎斜暉燕
踏花枝語蜂縈柳絮歸輕颺宜白紵時節近清微

其二

好事憐春老無愁耐日長爐烟驚扇影酒向舞花光照
水雲容嬾移牀竹意涼更煩紅槿帽促拍打山香

天都峯

維帝有下都作鎮此南國孤撐紫玉樓橫絕大霄碧晶
熒砂竇紅天矯泉紳白晴雲無盡藏竟日裊幽石諸峯
三十五離立侍傍側會稽眇小哉請議職方籍

次韻唐子光席上賞梅

玉枝橫斜照清空纖手撚香俱惱公水部無人廣平去
後來我輩猶情鍾誰噴昭華送愁絕叫雲三弄怨斜月
徑須踏雪問前村莫待馬蹄如踣鐵春風壓盡百華橋
尊前仍有董嬌嬈惜無楚客歌成調空著蕭郎眼似刀

癸亥立春泊舟吳會亭

去年春盤游江驛湛湛清波動浮石今年春盤吳會亭
冥冥細雨濕高城天邊作客風沙裏去年今年成老矣
客心古井冷如水憶昔三生住翠微偶來平地著征衣
山中故人應大笑扁舟坐穩何當歸

後催租行

老父田荒秋雨裏舊時高岸今江水傭耕猶自抱長飢
的知無力輸租米自從鄉官新上來黃紙放盡白紙催

賣衣得錢都納却痛骨雖寒聊免縛去年衣盡到家口
大女臨岐兩分首今年次女已行媒亦復驅將換升斗
室中更有第三女明年不怕催租苦

次韻陳季陵寺丞求歙石眉子硯

金星熒熒看子綠婺源琢石如琢玉寶玩何曾捋枵腹
但愛文君遠山慙丈人筆陣森五兵書品入妙仍詩名
我有坡陀天海樣與公文字俱金聲臬盧一擲不須呼
况敢定價論車渠只煩將到粧臺下試比何如京兆畫

次韻李陵貢院新晴

鎖闥令嚴深復深
五星簾幕晴若陰
澹雲微月謾清夜
短檠政自闌人心
看燈作暈生睡色
江南行處夢不隔
覺來快讀新晴篇
恍然賓我鶯花前
徑欲觴公後堂酒
儻煩春衫小垂手

重遊南嶽

捨舟得馬如馭氣
步入青松三十里
我從蠻嶺瘴烟來
不怕雨雲埋嶽趾
憶昔南征疑廟庭
往來無恙神所祉

當時已有歸田願帝臨此心如白水煌煌南正館于東
手握八觚溫玉璽駿奔潛霍左右輔好生不殺扶炎紀
崇禋竣事曉壇空躋攀小試青鞵底不知雲磴幾千丈
但見漫山白虎尾石頭招我上南臺瑞應闌干天半倚
福嚴鐘聲過橋來髣髴三生如夢裏堂中尊者已先去
苔鎖嚴扉何日啟竹嫌磽确老愈瘦松畏高寒蟠不起
癯儒尚病怕深登幽討未窮行且止我評七十二高峯
鬱律穹隆少觀美儼然可瞻不可玩往往雄尊如負屨

乃知嶽鎮蓋深厚不與他山爭秀偉區區獻狀眩兒童
乳洞淡巖真戲耳

巫山高

余舊嘗用韓無咎韻題陳季陵巫山圖考宋玉賦意
辨高唐之事甚詳今過陽臺之下復賦樂府一首世
傳瑤姬為西王母女嘗佐禹治水廟中石刻在焉

濕雲不收烟雨霏峽船作灘稍廟磯杜鵑無聲猿叫斷
惟有飢鴉迎客飛西真功高佐禹跡斧鑿鱗皴倚天壁

上有寶簪十二尖下有黃湍三百尺蔓花蚪木風烟昏
鮮佩翠帷香火寒靈旂飄忽定何許時有行人開廟門
楚客詞章元是諷紛紛餘子空嘲弄玉色頽頽不可干
人間錯說高唐夢

離堆行

殘山狼石雙虎卧斧跡鱗皴中鑿破潭淵油油不敢唾
下有猛虎踰鐵鑠自從分流注石門西州秔稻如黃雲
封羊五萬大作社春秋伐鼓蒼烟根我昔官稱勸農使

年年來激西江水成都火米不論錢絲管相隨看蠶市
款門得得酹清尊椒漿桂酒刪羶葷妄欲一語神宣聞
更願愛羊如愛人

毛公壇福地

松蘿滴翠白晝陰七十二峯中最深綠毛仙翁已仙去
惟有石壇留竹塢竹陰掃壇石槎牙漢時風雨生蘚花
山中笙鶴尚遺響湖外人烟驚歲華道人眸子照秋色
邀我分山築丹室驅丁役甲莫免嬉渴飲隱泉飢餌朮

燈市行

吳臺今古繁華地偏愛元宵影燈戲春前臘後天好晴
已向街頭作燈市疊玉千絲似鬼工剪羅萬眼人力窮
兩品爭新最先出不待三五迎東風免郎種麥荷鋤倦
偷閒也向城中看酒爐博塞雜歌呼夜夜長如正月半
災傷不及什之三歲寒民氣如春酣儂家亦幸荒田少
始覺城中燈市好

湘口夜泊南去零陵十里矣營水來自營道過

零陵下湘水自桂林之海陽至此與營會合

為一江

我從清湘發源來直送湘流入營水故人亭前合江處
暮夜檣竿矗沙尾却從湘口望湘南城郭山川悅灘紀
萬壑千巖詩不徧惟有蒼苔痕履齒三年瘴霧亦奇絕
浮世登臨如此幾湖南北色夾山來無復搖蓼挿天起
坡陀狼石蹲清漲澹蕩光風浮白芷騷人魂散若為招
傷心極目春千里我亦江南轉蓬客白鳥愁烟思故里

遠遊雖好不如歸一聲鶗鴂花如洗

代聖集贈別

一曲悲歌水倒流樽前何計緩千憂事如夢斷無尋處
人似春歸挽不留草色粘天鶗鴂恨雨聲連晚鷓鴣愁
迢迢綠浦帆飛去今夜新晴獨倚樓

二月三日登樓有懷金陵宣城諸友

百尺西樓十二欄日遲花影對人閒春光已入片時夢
寒食從今數日間折柳故情都望斷落梅新曲與愁關

詩成欲訪江南便千里烟波萬疊山

南徐道中

半生行路與心違又逐孤帆擘浪飛吳岫湧雲穿望眼
楚江浮月冷征衣長歌悲似垂垂淚短夢紛如草草歸
若使一塵供閉戶肯將青雀易柴扉

立春日郊行

竹擁溪橋麥蓋坡土牛行處亦笙歌麴塵欲暗垂垂柳
醅面初明淺淺波日滿縣前春市合潮平浦口暮帆多

春來不飲魚無句奈此金觥綵勝何

餘杭道中

落花流水淺深紅盡日帆飛繡浪中
桑眼迷離應欠雨
麥鬚騷殺已禁風
牛羊路杳千山合
雞犬村深一徑通
五柳能消多許地
客程何苦鎮匆匆

陳侍御園坐上

愁眼逢歡春水明
詩情得酒春雲生
花稍蝴蝶作團去
竹裏鴉鳩相對鳴
邂逅浮生此日好
纏綿俗累何時輕

金人四十二卷
卷一百七十四
壁牋沫墨乏奇句壓笛當年慙妙聲

夜宴曲

金麟噴香烟龍蟠玉燈九枝青闌干明瓊押帶湘簾斑
風幃繡浪千飛鸞舞娥紫袖如弓彎雲中一笑天解顏
銜杯快卷玻璃乾花樓促箭春宵寒二十五聲宮點闌

田家留客行

行人莫笑田家小門戶雖低堪灑掃大兒繫驢桑樹邊
小兒拂席軟勝壇木白新春雪花白急炊香飯來看客

好人入門百事宜今年不憂蚕麥遲

倦繡

鴉兒弄暖綠苔走花風薰人濃似酒困來如醉復如愁
不管低鬟釵燕溜無端心緒向天涯想見檣竿幙脚斜
槐陰忽到簾旌上遲却尋常一線花

病中夜坐呈致遠

似霧如烟氣夜浮鶴鳴驚睡起搔頭含風竹影淡留月
著雨蛩聲深怨秋萬事心空癡已慣百骸歲晚病相收

便當采藥西山去病足蹢躅怕遠遊

嶺上紅梅

霧雨胭脂照松竹江南春風一枝足滿城桃李各嫣然
寂寞傾城在空谷城中惟解惜娉婷遊子路傍空復情
花不能言客無語日暮清愁相對生

天平先隴道中時將赴新安掾

霜橋水碓淨無塵竹塢梅溪未放春百疊海山鄉夢熟
三年江路旅愁新松楸永寄孤窮淚泉石終收漫浪身

好住隣翁各安健歸來相訪說情真

積雨蒸潤體中不佳頗思故居之樂戲書呈子

文

門外泥深蘸馬鞍墨雲未放四羅寬前山忽接後山暗
暑雨全如秋雨寒夢裏江湖三歎息醉中天地一憑欄
斗升留滯休惆悵枳棘從教著鳳鸞

趙聖集誇說少年俊遊用前韻記其語戲之

京塵紅軟撲雕鞍年少王孫酒量寬倚袖竹風憐翠薄

捧杯花露怯金寒黃雲城上栖烏曲綠水池邊鬪鴨攔
別後相思惟故物壁煤侵損扇中鸞

送吳智叔檢詳直中祕使閩

抗章襍被豈公難已說高風立懦頑客路莫嫌河畔草
直廬須愛道家山秋生蓮浦船初泛春滿茶谿騎趣還
却訪故人西府舊定煩書札墮田間

送陳朋元赴溧陽

九畹滋蘭靜自芳啁啾誰復認孤凰風流歲晚嫌杯酒

文字功深得鬢霜歛板君猶能俛仰倚樓吾敢計行藏
船開便作江南客天色無情更雁行

玉堂寓意

摘文窓戶九霄中岍憤燒香愧老農上直馬歸催下鑰
傳更人唱促鳴鐘金城截窠雲千雉碧瓦參差月萬重
骨冷魂清都不夢玉階蕭瑟聽秋蛩

送汪仲嘉待制奉祠歸四明分韻得論字

丹霄碧海眇高騫厭直承明却自論寶馬十年聽漏箭

金史四庫全書
卷一百七十四
扁舟一雨看潮痕侍臣想憶松門遠歸客還憐菊逕存
清潤要非山澤相須煩一札下雲根

初約隣人至石湖

窈窕崎嶇學種園此生丘壑是前緣隔離東日浮天水
當戶南山匝地烟春入葑田蘆綻笋雨傾沙岸竹垂鞭
荒寒未辦招君醉且吸湖光當酒泉

次韻許季韶通判雪觀席上

把酒臨風瑞露傾瓊漿何用謁雲英捲簾雨脚銀絲掛

倚杖江頭綠漲生
嶺海一涼蘇暑病
山林千嶺試秋聲
茲遊竒絕忘羈宦
慚愧烟中短棹橫

甲午歲朝寓桂林記去年是日泊桐江謁嚴子陵祠迺遷度嶺感懷賦詩

去年春纜解江臯也
把屠蘇泛濁醪
一席飽風漁浦濶
千山飛雪釣臺高
將軍老矣孤鳴劍
客子歸來詠大刀
早晚扁舟尋舊路
枕樓吹笛破雲濤

題湘山大施堂

重倚春林淚竹枝南遊風物鬢成絲難尋桂海千峯夢
更了湘山一段奇來去別無心外法行藏休問塔中師
若論大施門前事竿木逢場且賦詩

將至公安

前村後村啼杜宇伴人憂煎與人語雲寒日薄春一夢
地濶天低淚如雨我馬虺隤我僕痛豈不懷歸畏簡書
公安縣前酒可沽不如且聽提葫蘆

入秣歸界

山根繫馬得漿家深入窮鄉事可嗟
蚯蚓惹人能作瘡
茱萸隨俗強煎茶幽禽不見但聞語
野草無名都著花
窈窕崎嶇殊未艾去程方是問三巴

峽石舖

峯頭壁立偉天造萬雉石城如帶繞
山骨鱗皴火種難
山下沅泉却宜稻新秧一稜綠茸茸
茆花先秋雪搖風
后皇嘉種不易熟野草何為攬歲功

別後寄題漢嘉月榭

隱吏詩情卜築幽同年惜別勸淹留試傾萬景湖亭酒
來看半輪江月秋川路雖長猶共此夜船空載且歸休
碧巖勝處頻回首好事誰能更小樓

婆羅平

仙聖飛行此是家路逢真境但驚呀神農嘗外盡靈藥
天女散餘多異花嵐雨逼衣寒似鐵冰泉炊米硬如沙
峯頭事事殊塵世缺甃跳梁笑井蛙

鄂州南樓

誰將玉笛弄中秋黃鶴飛來識舊遊漢樹有情橫北渚
蜀江無語抱南樓燭天燈火三更市搖月旌旗萬頃秋
却笑鱸鄉垂釣手武昌魚好便淹留

東林寺

談易繙經宰木春三生猶自裊烟熏客塵長隔虎溪水
劫火不侵香谷雲老矣懶供蓮社課歸哉欣讀草堂文
山頭一任天燈現箇事何曾落見聞

再渡胥口

古來此地快蓬心天繞明湖日照臨一雁雲平時隱見
兩山波動對浮沈衰髯都共荻花老醉面不如楓葉深
罾戶釣徒來問訊去年盟在肯重尋

次韻虞子建見咍贖帶作醺

兒女傳觀省見稀病身聊復惜光輝莫嫌憔悴沈腰瘦
且喜間關秦璧歸不是典來還酒債亦非將去換蓑衣
塵魚甌金時相阮微汝誰能為解圍

題夫差廟

縱敵稽山禍已胎垂涎上國更荒哉不知養虎自遺患
只道求魚無後灾夢見梧桐生後圃眼看麋鹿上高臺
千齡只有忠臣恨化作濤江雪浪堆

青城山何子方使君同年園池

擅勝芋壠意中行浩蕩薰風不計程兩脚背人歸玉壘
江聲隨馬入青城五橋今日新知路千佛當年舊綴名
水竹光中同一笑丐君荷露濯塵纓

續長恨歌四首

金盃漱灝曉粧寒國色天香勝牡丹白鳳詔書來已暮
六宮鈿粉半春闌

紫微金屋閉春陽石竹山花却自芳莫道故情無覓處
領巾猶有隔生香

驪山六十二高樓突兀華清最上頭玉羽川長湘浦暗
三郎無事更神遊

帝鄉雲馭若為留八景三清好在不玉笛不隨雙鶴去
人間猶得聽梁州

題山水橫看二首

烟山漠漠水漫漫老柳知秋渡口寒盡是西溪腸斷處
憑君將與故人看

霜入丹楓白葦林橫林平遠暮江深君看雁落帆飛處
知繫秋風故國心

浙江小樓春日

客裏無人共一杯故園桃李為誰開春潮不管天涯恨
更捲西興暮雨來

初夏

晴絲千尺挽韶光
百舌無聲燕子忙
永日屋頭槐影暗
微風扇裏芰花香

曉行

篝燈驛吏喚人行
寥落星河向五更
馬上誰驚千里夢
石頭岡下小車聲

春曉即事

屋頭清樾暗荆扉
紫萼爛斑翠筴肥
春晚軒窓人獨困

日長籬落燕雙飛

晚春三首

陰陰垂柳閉朱門
一曲闌干一斷魂
手把青梅春已去
滿城風雨怕黃昏

客去筠窓詠小詩
遊絲掩亂柳花稀
微風盡日吹芳草
蝴蝶雙雙貼地飛

夕陽槐影上簾鉤
一枕清風夢昔遊
夢見殘塘春盡處
碧桃花謝水西流

題城山挂月堂壁

百疊烟鬟得眼明，坐來心跡喜雙清。
秋陽滿地西風起，猶有啼鶯四五聲。

題畫卷

歌傾棧路繞山明，隔壠人家犬吠聲。
無限白雲堆去路，不知誰識許宣平。

晚潮

東風吹雨晚潮生，疊鼓催船鏡裏行。
底事今年春漲小，

去年曾與畫橋平

碧瓦

碧瓦樓頭繡幕遮
赤欄橋外綠溪斜
無風楊柳漫天絮
不雨棠梨滿地花

晚步

排門簾幕夜香飄
燈火人聲小市橋
滿縣月明春意好
旗亭吹笛近元宵

橫塘

南浦春來綠一川
石橋朱塔兩依然
年年送客橫塘路
細雨垂楊繫畫船

夜歸

竹輿伊軋走長街
掠面風清醉夢迴
曲巷無聲門戶閉
一燈還照酒爐開

斑驢

斑驢別後月纖纖
門外疎桐影畫簾
留下阿憐將不去
西風吹入兩眉尖

自天平嶺過高景庵

卓筆峯前樹作團
天平嶺上石成關
綠陰匝地無人過
落日秋蟬滿四山

高景山夜歸

伊軋籃輿草露間
夜深林月覆孱顏
忽逢陂水明如鏡
照見沈沈倒影山

衮中道中

虎嘯狐鳴苦竹叢
魂驚終日走蒙茸
松林斷處前山缺

又見南湖數十峯

遊寧國奉聖寺

松梢臺殿欲高標
山轉溪迴一水朝
不惜褰衣呼小渡
夜來春漲失浮橋

道見蓼花

秋風嫋嫋露華鮮
去歲如今刺釣船
歛縣門西見紅蓼
此身曾在白雲邊

桐廬

濕雲垂野澹疎林十日山行九日陰
梅子弄黃應要雨
寧知客路已泥深

次韻馬少伊郁舜舉寄示同遊石湖詩卷四首
鏡面波光倒碧峯
半湖雲錦萬芙蓉
去年蕩槳香風裏
行傍石橋花正濃

紅皺黃團熟暑風
甘瓜削玉藕玲瓏
身謀已落園丁後
滿帽京塵日正中

得得來題小隱詩
拂花索柳畫船移
湖邊好景春猶未

須到秋清月滿時

瀟灑王郎亦勝遊今年何事阻清遊當家風味今如此
孤負山陰夜雪舟

社日獨坐

海棠雨後沁燕脂楊柳風前撚綠絲香篆結雲深院靜
去年今日燕來時

春日三首

藥欄花暖小猧眠雪白晴雲水碧天煮酒青梅寒食過

夕陽庭院鎖鞦韆

西窗一雨又斜暉
睡起薰籠挽夾衣
莫放珠簾遮洞戶
從教燕子作雙飛

雙鯉無書直萬金
畫橋新綠一篙深
青蘋白芷皆愁思
不獨江風動客心

虞姬墓

劉項家人總可憐
英雄無策庇嬋娟
戚姬塋處君知否
不及虞兮有墓田

宜春苑

孤塚糴蹊滿路隅行人猶作御園呼連昌尚有花臨砌
腸斷宜春寸草無

秦樓

攔街看幕似春遊斑犢雕車碧畫油奚女家人稱貴主
縷金長袖倚秦樓

叢臺

憑高閱士劍如林故國風流變古今袷服雲仍猶左袞

叢臺休恨綠蕪深

臨洺鎮

竟日霜寒暮解圍
融融桑柘染斜暉
北人爭勸臨洺酒
云是棚頭得免歸

安肅軍

從古銅門控朔方
南城烟火北城荒
臺家抵死爭塘灤
滿眼秋蕪襯夕陽

盧溝

草草興梁枕水坻忽忽小駐濯漣漪河邊服匿多生口
長記輶車放雁時

燕賓山

九日朝天強作驩也將佳節勸盃盤苦寒不似東籬下
雪滿西山把菊看

初見山花

三日晴泥尚沒鞞幾時風雨過年華湘東二月春纔到
恰有山櫻一樹花

與鄭少融趙養民二使者訪古訾家洲歸憩松
間二君欲助力興廢戲書此付長老善良以
當䟽頭

飄飄竹雨潤輕裘
嫋嫋松風繫小舟
安得從容興廢手
越人重上訾家洲

羅江

嶺北初程分外貪
驚心猶自怯晴嵐
如何花木湘江上
也有黃茆似嶺南

清湘驛送王柳州南歸一絕

南歸北去路茫茫不是行人也斷腸
可惜湘江春夜月落花時節照離觴

泊衡州

客裏仍哦對雨吟夜來星月曉還陰
空江十日無春事船到衡陽柳色深

九盤坡布水

莫惜縈迴上九盤洗心雙瀑雪花寒
野翁酌水煎茶獻

自古人來到此難

四十八盤

詰曲不如前宦拙
欹傾當面似交難
若將世路北山路
世路更多千萬盤

入崇德界

桑間三宿尚回頭
何況三年濯錦遊
草草郛筒中酒處
不知身已在彭州

最高峯望雪山

大面峯頭六月寒神燈收罷曉雲班
浮空忽湧三銀闕
云是西天雪嶺山

宋玉宅

悲秋人去語難工
搖落空山草木風
猶有市人傳舊事
酒壚還在宋家東

銷夏灣

蓼磯楓岸放離宮
一曲清漣九里風
縱有暑光無着處
青山環水水浮空

與現壽二長老遊壽泉因話去年秋屋之遊題

贈

何方錫杖斲清甘天遣深源壽此庵金鑿萬枝浮倒影
為君題作菊花潭

松風放浪入雲關二衲相從一士間人與瘦筇俱老健
去年今日在包山

元夜大風雨一絕

東風無賴妬華年一夜淒寒到酒邊放盡珠簾遮寶炬

莫教簷雨濕青烟

三江亭觀雪

陰山陽朔雪中迴行到天西
玉作堆乘興却遊東海上
白銀宮闕認蓬萊

鰻井

鍊甃神通未易論
雨聲留客夜翻盆
不辭客路春泥滑
且足秧田舊水痕

元日馬上絕

沈絮心情雪樣髯詩囊羞澀酒盃嫌年來萬事都消減
惟有牀頭厯日添

元夕

粉痕紅點萬花攢玉氣枝光寶月團簾箔通明香似霧
東風無處著春寒

石湖芍藥盛開向北使歸過維揚時買根栽此
因記舊事

竹西歌吹荻花秋遺老垂洩送遠遊羌笛夜闌吹出塞

當年如此夢揚州

春日田園雜興

柳花深巷午雞聲
桑葉尖新綠未成
坐睡覺來無一事
滿窓晴日看蠶生

高田二麥接山青
傍水低田綠未畊
桃杏滿村春似錦
踏歌推鼓過清明

社下燒錢鼓似雷
日斜扶得醉翁迴
青枝滿地花狼籍
知是免孫鬪草來

吉日初開稻種包南山雷動雨連宵今年不欠秧田水
新漲看看拍小橋

晚春田園雜興

三旬蠶忌閉門中隣曲都無步往蹤猶是晚晴風露下
採桑時節暫相逢

烏鳥投林過客稀前山烟暝到柴扉小童一棹舟如葉
獨自編欄鴨陣歸

夏日田園雜興

梅子金黃杏子肥
麥花如雪菜花肥
日長籬落無人過
惟有蜻蜓蛺蝶飛

黃塵行客汗如漿
少住儂家漱井香
借與門前盤石坐
柳陰亭午正風涼

秋日田園雜興

菽粟瓶罌貯滿家
天教將醉作生涯
不知新酒堪簞未
今歲重陽有菊花

細搗橙蕓買鱸魚
西風吹去四腮鱸
雪菰酥膩干絲縷

除却松江到處無

冬日田園雜興

屋上添高一把茆
密泥房曲似僧寮
從教屋外陰風吼
卧聽籬頭響玉簫

松節然膏當燭籠
凝烟如墨暗房櫳
晚來拭淨南窗紙
便覺斜陽一倍紅

題秋鷺圖

昨夜新霜冷釣磯
綠荷消瘦碧蘆肥
一江秋色無人問

盡屬風標兩雪衣

晚思

蘚牆莎砌響幽蟲
睡起繡書覺夢中
殘暑一窗風不動
秋陽入竹碎青紅

重送文處厚因寄蜀父老

下峽東歸十五年
因君話舊意茫然
煩將遠道悠悠夢
直到天西暑雪邊

曉起


簾額繡波盪漾燭盤紅淚闌干夢裏五更風急愁邊一
半春殘

題如夢堂壁

勃姑雨啼喚午鴨鳩曉嚙留春片雲不載歸夢兩鬢全
供客塵

先人嘗為萃等言自十四五好為詩文晚時深篤或
寢疾醫以勞心見止亦以政自不能不爾謝之手編
僅成帙而弃不肖之孤其尚忍言哉詩文凡百有三

十卷求序于楊先生誠齋求校于龔編脩芥隱而刊
于家之壽櫟堂春秋霜露思其所嗜思其所樂優然
如見愾然如聞也嘉泰三年旦日萃茲謹書



石倉歷代詩選卷一百七十四

欽定四庫全書

集部

石倉歷代詩選卷一百七十五至

詳校官庶吉士臣范逢恩

侍讀臣孫球覆勘

總校官進士臣朱

鈐

校對官中書臣孫

球

謄錄監生臣劉

遠

欽定四庫全書

石倉歷代詩選卷一百七十五

明 曹學佺 編

宋詩五十二

陸游

種桑

孔明百畝桑景畧十具牛豈無子孫念飽煖自可休種
桑吾廬西微徑出南陌三月葉暗園四月堪可摘戴勝

枝上鳴倉庚葉間飛飛鳴各自適人生胡不歸歸家力
農桑慎勿怨貧賤婚嫁就比隣死生長相見

航海

我不如列子神遊御天風尚應似安石悠然雲海中卧
看十幅蒲彎鑾若張弓潮來湧銀闕忽復摩青銅飢鶻
掠船舷大魚舞虛空流落何足道豪氣蕩肺曾歌罷海
動色詩成天改容行矣跨鵬背弭節蓬萊宮

晚步

院荒有古意僧少無人聲徘徊楠陰下賞此落日明著
書亦何急寂寞身後名今年復止酒歌舞陳空觥不如
且逍遙出門隨意行看竹入廢園望江上高城纖纖素
月出靄靄蒼烟橫此夕當復竒緱山吹玉笙

天王廣教院在叢山東麓余年二十時與老僧
惠迪遊畧無十日不到也淳熙甲辰秋觀潮
海上偶繫舟其處策杖再遊恍如隔世

遊山如讀書深淺皆可樂道傍小精舍亦自一丘壑淒

涼四十年始復重著脚老僧逝已久講坐塵漠漠當時
童子輩衰鬢亦蕭索掃壁觀舊題歲月真電電文章卑
不傳衣食窘如昨出門意惘然遼海渺孤鶴

投梁叅政

浮生無根株志士惜浪死雞鳴何預人推枕中夜起生
也本無奇折腰百僚底流離鬢成絲悲咤淚如洗殘年
走巴峽辛苦為斗米遠衝三伏雲直指九月水回首長
安城未忍便萬里袖詩叩東府再拜求望履平生實易

足名幸汙黃紙但憂死無聞功不掛青史天道如張弓
一彼復一此何時嫖姚師大剗渭橋耻士各奮所長儒
生未宜鄙覆瓿草軍書不畏寒墮指

雙清堂夜賦

陸子病少間獨卧溪上堂人間魚自躍風定荷更香素
月行中天流螢失孤光歸鳥飛有聲度此十里塘嗟我
獨何事遲暮客異鄉太息搔短髮起視夜未央

南軒

今年秋早涼七月已蕭然南軒脩竹下枕簟終日眠時
將半殘夢聽此欲斷蟬推枕起太息四序忽已遷功名
墮渺莽衰疾方連綿新月獨多情窺窓淡娟娟

舟中聞姑惡

女生藏深閨未省窺牆藩上車移所天父母為他門妾
身雖甚愚亦知君姑尊下床聞鷄鳴梳髻著襦裙堂上
奉灑掃厨中饋盤食青青摘葵莧恨不美熊蹯姑色少
不怡衣袂濕淚痕所異妾生男庶幾姑弄孫此意竟蹉

跼薄命來讒言放棄不敢怨所悲辜大恩古路傍陂澤
微雨鬼火昏君聽姑惡聲無乃遺婦魂

對酒

閒愁如飛雪入酒即相融好花如故人一笑杯自空流
鶯有情亦念我柳邊盡日啼東風長安不到十四載酒
徒往往成衰翁九環寶帶光照地不如留君雙頰紅

歲暮

離離井上桐鬱鬱牆下桑零落豈不悲無奈中夜霜蟬

蟀更可念歲暮依空堂客亦自孤寂衣篝歇殘香一燈
掛西壁耿耿青無光援筆欲寫愁三喟不成章

夏夜

落月不滿窓驚鵲屢移樹沈憂少睡眠亦以衰疾故五
更忽作夢立馬青衣渡白首厭山村郵亭憶征步

月夕

開戶滿庭雪徐看知月明微風入叢竹復作雪來聲俗
塵不待掃凜然肺肝清林深無漏鼓鶴唳報三更

鹿門關過龐士元祠

士元死千載淒惻過遺祠
海內常難合天心豈易知
英雄今古恨父老歲時思
蒼蘚無情極秋來滿斷碑

梅市道中

雨暗山陂路人喧在渡頭
廟垣新畫馬村笛遠呼牛
買飯諳爭席迎湖競解舟
平生苦吟處又送一年秋

辛酉冬至

今日日南至吾門方寂然
家貧輕過節身老怯增年
畢

祭皆扶拜分盤獨早眠
惟應探春夢已繞鏡湖邊

清明

氣候三吳異清明乃爾寒
老增丘墓感貧苦道途難
燕子家家入梨花樹樹殘
一春回首盡懷抱若為寬

即事

樽酒如江綠春愁抵草長
但令間一日便擬醉千場
柳弱風禁絮花殘雨漬香
客遊還役役心賞竟茫茫

溪行

蓬筍鳴春雨，帆蒲掛暮烟。
買魚尋近市，覓火就隣船。
愁卧醒還醉，灘行却復前。
長年殊可念，力盡逆風牽。

寓歎

小雨初涼夜，殘燈欲暗時。
病多愁近雨，心弱怯題詩。
舊友殊方少，歸耕晚歲宜。
回頭視孤影，此意有君知。

峽州甘泉寺

江上甘泉寺，登臨擅一州。
山亭喜無恙，老子得重遊。
灘急常疑雨，林深欲借秋。
歸途更清絕，倚杖喚漁舟。

春晚苦雨

垂老卧村野餘寒欺病身雞猶未忘旦雨欲不容春忽
忽花時過茫茫草色勻萼絲已上市一飯未傷貧

醉賦

霜楓照茆屋露菊挿紗巾今古無窮事江湖未死身直
令依馬捱終勝拜車塵我亦輕餘子君當恕醉人

長汀道中

晚過長汀驛溪山乃爾奇老夫惟坐嘯造物為陳詩鳥

送穿林語松垂拂澗枝憑鞍久忘發不是馬行遲

春雨

春愁無處避春雨幾時晴黯黯陰連月蕭蕭滴到明窓
昏減書課絃緩咽琴聲何以娛幽獨新醅手自傾

悶極有作

貴已不如賤狂應又勝癡新寒壓酒夜微雨種花時堂
下藤成架門邊枳作籬老人無日課有興即題詩

欲行雨未止

幽幔依燈影空階送雨聲暫歸仍客路投老倍鄉情眼
澀書難讀心搖夢易驚病多猶怕醉酒盡却思傾

池亭夜坐

池上小亭幽清宵秉燭遊荷盤時寫露螢草夕知秋有
感歲時速無聲河漢流殊方不堪住歸夢遶滄洲

小舟過吉澤効王右丞

澤國霜露晚孤村烟火微本去官道僻自然人迹稀木
落山盡出鐘鳴僧獨歸漁家間似我未久掩柴扉

寄楊濟伯

聞道皇華使來從萬里回五溪春薺老三峽暮猿哀昔
日文昌省頻年灩澦堆問君何地樂斟酌寄聲來

殘臘

殘臘無多日吾生又一年林塘明夕照墟落淡春烟山
色危攔角梅花綠酒邊歲時元自好老病獨淒然

芳草曲

蜀山深處遮孤驛缺甃傾垣芳草碧家在江南妻子病

離鄉半歲無消息長安城門西去路細靄斜陽芳草暮
尊前一曲渭城歌馬蹄萬里交河戍人生誤計覓封侯
芳草愁人春復秋只願東行至滄海路窮草斷方無愁

遊漢州西湖

房公一跌叢衆毀八年漢州為刺史遶城鑿湖一百頃
島嶼曲折三四里小庵靜院穿竹入危榭飛樓壓城起
空濛烟雨媚松楠顛倒風霜老葭葦日月苦長身苦閒
萬事不屑看湖水向來愛琴雖一癖觀過自足知夫子

畫船載酒凌湖光想公樂飲千萬場歎息風流今不泯
兩川名醞避鶯黃

瑞草橋道中作

經年簿書無少暇款段今朝欣一跨瑞草橋邊水亂流
青衣渡口山如畫老翁醉著看龍鍾小婦出窺聞姪姪
荒陂吹笛晚呼牛古路倚梯晨採柘殘花零落不禁折
芳草丰茸如可藉郵亭慈竹笋穿籬野店蒲萄枝上架
功名垂世端有待利欲昏心喜乘罇羈窮自笑豈人謀

閒放每欲從天借草根蟲語祇自悲風裏蓬征安稅駕
祖師補處浣花村會傍清江結茅舍

對酒懷丹陽成都故人

勞生常羨髑髏樂死時却悔生時錯花前有酒不肯狂
回首朱顏已非昨君看古來賢達人終日飲酒全其真
世間萬事竟何有金樽翠杓差閒身放翁少日無閒客
飛觴縱樂皆豪傑清歌一曲梁塵起腰鼓百面春雷發
故人仙去蓬萊宮鸞絲鳳竹舞春風石帆山下孤舟雪

一段清愁付此翁

短歌行

百年鼎鼎世共悲
晨鐘暮鼓無休時
碧桃紅杏易零落
翠眉玉頰多別離
涉江采菱風敗意
登樓待月雲為祟
功名常畏謗讒興
富貴每同衰病至
人生可歎十八九
自古危機無妙手
正令挿翮上青雲
不知得錢即沽酒
飲酒近村

放翁睡多少
行立人扶往
赴隣里集
痛飲山花
挿髻紅

醉歸荊棘沾衣濕紗巾一幅何翩翩庭中弄影不肯眠
莫欺此老今衰甚曾見高皇狩越年

舟中對酒

百壺載酒遊凌雲醉中揮袖別故人依依向我不忍別
誰知我眉半輪月月窺船窓掛淒冷欲別渝州酒初醒
江空裊裊釣絲風人靜翩翩葛巾影哦詩不睡月滿船
清寒入骨我欲仙人間更漏不到處時有沙禽背船去

漁翁

江頭漁家結茆廬青山當門畫不如江烟淡淡雨踈踈
老翁破浪行打魚恨渠生來不讀書江山如此一句無
我亦衰遲慙筆力共對江山三歎息

遊諸葛武侯書臺

沔陽道中草離離卧龍老矣空遺祠當時典午稱猾賊
氣喪不敢當王師定軍山前寒食路至今人祠丞相墓
松風想像梁父吟尚憶愔然答三顧出師一表千載無
遠比管樂蓋有餘世上俗儒寧辨此高臺當日讀何書

十月九日與客飲忽記去年此時自錦屏歸山
南道中小獵今又將去此矣

去年縱獵韓壇側玉鞭自探南山雪今年痛飲蜀江邊
金杯却吸我眉月竹枝歌舞新教成淒涼傳得三巴聲
城頭築觀出雲雨我眉正與闌干平酒酣詩就擲杯去
醉踏玻璃江上路懸知幽澗斷橋邊已有梅花開滿樹
同何元立賞荷花懷鏡湖舊遊

少壯欺酒氣吐虹一笑未了千觴空涼臺下簾人似玉

月色冷冷透湘竹三更畫船穿藕花花為四壁船為家
不須更踏花底藕但嗅花香已無酒花香不見畫船行
天風吹斷白紵聲雙槳歸來弄湖水往往湖邊人已起
即今憔悴不堪論賴有何郎共此尊紅綠疎疎君勿歎
漢嘉去歲無荷香

滄灘

百夫正謹助鳴榔舟中對面不得語須臾人散寂無譁
惟聞百丈轉兩車嘔嘔啞啞車轉急舟人已在沙際立

霧飲蘆村落照紅雨餘魚舍炊烟濕故鄉回首已千山
上峽初經第一灘少年亦慕宦遊樂投老方知行路難

春愁曲

伏羲三十餘萬歲春愁歲歲常相似外大瀛海環九州
無有一州無此愁我願無愁但歡樂朱顏綠鬢常如昨
金丹九轉徒可聞玉兔千年空搗藥蜀姬雙鬟姪姪嬌
醉看恐是海棠妖世間無處無愁曲底事難過萬里橋

明河篇

明河八月轉分明
炯如素練西南傾
年年歲歲見河漢
坊坊曲曲聞砧聲
良人萬里事征行
砧聲中有玉關情
遙知鐵衣冷如水
指定明河白髮生
磧中草死駱駝鳴
萬里却望長安城
兜生總角爺未見
歸心頓覺封侯輕
漢家自古有匈奴
付與窮荒何足圖
只願無光太白低
還家為婦說征西

吳娘曲

鏡奩蠶出千蟻黑
釵梁梅小雙青豆
吳娘十四未知愁

羅衣已覺傷春瘦，閒尋女伴過西家。
蘭草歸來日未斜。
睡睫蒙蒙嬌欲閉，隔簾微雨壓楊花。

東吳女兒曲

東吳女兒語如鶯，十三不肯學吹笙。
鏡奩初喜稚蠶出，窓眼已看雙繭成。
庭空日暖花自舞，簾卷巢乾燕新乳。
阿弟貪書下學遲，獨揀詩章教鸚鵡。

聽琴

疎簾曲檻蘋風涼，細腰美人藕絲裳。
綠藤水紋穿矮床。

玉指纖纖彈履霜高林鶯囀日正長幽澗泉鳴夜未央
哀思不怨和而莊有齋淑女禮自防世人但惑青樓倡
琵琶篴篥雜胡羌試聽一曲醒汝狂文姬指法傳中郎
夏白紵

雲母屏薄望如空水晶簾疎不礙風美人獨立何所似
白玉芙蓉秋水中素綃細織水蠶縷清寒不受人間暑
晚來浴罷綠窗閒自把新詩教鸚鵡

得韓無咎書寄使北時宴東都驛中所作小閨

大梁二月杏花開錦衣公子乘傳來桐陰滿第歸不得
金轡玲瓏上源驛上源驛中搥畫鼓漢使作客誰作主
舞女不記宣和粧廬兒盡能邊城語書來寄我宴時詞
歸鬢知添幾縷絲有志未須深感慨築城會據拂雲祠

題少陵畫像

長安落葉紛可掃九陌北風吹馬倒杜公四十不成名
袖裏空餘三賦草車聲馬聲喧客枕三百青銅市樓飲
杯殘鬢冷正悲辛仗內鬪雞催賜錦

荊州歌

楚江粼粼綠如釀
銜尾江邊繫朱舫
東征打鼓掛高帆
西上湯豬聯百丈
伏波古廟占好風
武昌白帝在眼中
倚樓女兒笑迎客
清歌未盡千觴空
沙頭陌巷三千家
烟雨冥冥開橘花
峽人住多楚人少
土鎗爭上茱萸茶

蹋磧

鬼門關外逢人日
蹋磧千家萬家出
竹枝慘戚雲不動
劒氣聯翩日初夕
行人十有八九癭
見慣何曾羞顧影

江邊沽酒沙上卧峽口月出風吹醒人生未死信難知
憔悴夔州生鬢絲何日畫船搖桂楫西湖却賦探春詩

岳池農家

春深農家耕未足原上叱叱兩黃犢泥融無塊水初渾
雨細有痕秧正綠綠秧分時風日美時平未有差科起
買花西舍喜成婚持酒東隣賀生子誰言農家不入時
小姑畫得城中看一雙素手無人識空村相喚看繅絲
農家農家樂復樂不比市朝爭奪惡宦遊所得能幾何

我已三年廢東作

瞿塘歌

四月欲盡五月來峽中水漲何雄哉浪花高飛暑路雪
灘石怒轉晴天雷千艘萬舸不敢過篙師舵工心膽破
人人陰拱待勢衰誰敢輕行犯奇禍一朝時去不自由
山腹空有沙痕留君不見陸子歲暮來夔州瞿塘峽水
平如油

登錦城新樓徧至西園池亭

狂夫無計奈狂何，何況登臨逸興多。
千疊雪山連滴博，一更春水入摩訶。
吟餘騎省霜侵鬢，釣罷玄冥雨滿蓑。
逐敵榆間期尚遠，不妨隨處得婆娑。

感秋

西風急杵搗行衣，客子關情正此時。
萬事從今聊復爾，百年強半欲何之。
華堂蟋蟀悲清夜，金井梧桐戀故枝。
一枕淒涼眠不得，呼燈起作感秋詩。

早起至江原

喔喔鳴雞促曉程
翻翻飛鷺導孤征
節旌盡落歸猶遠
眼帶頻移瘦自驚
小市蕭條黃葉滿
斷橋零落綠苔生
居人猶復多愁思
何況天涯倦客情

絕勝亭

蜀漢遺蹤歲月侵
京華乖隔少來音
登臨忽據三江會
飛動從來萬里心
地勝頓驚詩律壯
氣增那惜酒杯深
一琴一劍白雲外
揮手家山何處尋

冬晚山房書事

山澤何妨老太平巉巉骨相本來清月明滿地看梅影
露下隔溪聞鶴聲未辨藥苗逢客問欲酬琴價約僧評
胡奴仁祖今俱絕且學湘纍拾菊英

謁凌雲大像

出郭幽尋一笑新忙呼艇子載烟津不辭老疾步高閣
却欲今生識偉人泉鏡正涵螺髻綠浪花那犯寶趺塵
始知神力無窮盡丈六黃金小果身

深居

作吏難堪簿領迷
深居聊復學幽棲
病來酒戶何妨小
老去詩名不厭低
零落野雲寒傍水
霏微山雨晚成泥
自憐甫里家聲在
小摘殘蔬遶敗畦

題丈人觀道院壁

淡烟浮月磬聲殘
木影如龍布石壇
偶駕青鸞塵世上
閒吹玉笛洞天寒
竒香滿院晨炊藥
異氣穿岩夜就丹
却笑飛仙未忘俗
金貂猶着侍中冠

晚登橫溪橋

金剛經卷之三
卷一百七十五
磬確坡頭筇竹枝西臨村路立多時賣蔬市近還家早
煮井人忙下麥遲病客情懷常怯酒山城光景盡供詩
晚來試問愁多少只託高樓橫笛吹

登劔南西川門感懷

自古高樓傷客情更堪萬里望吳京故人不見暮雲合
客子欲歸春水生瘴癘連年須藥石退藏無地着柴荆
諸公勉畫平戎策投老深思看太平

城上

疾步登城殊未衰欣然一笑擲筇杖正當閒似白鷗處
不減健如黃犢時秋野烟雲橫慘淡暮天樓閣倚參差
高吟醉舞忘歸去乞與丹青設色奇

秋晚登城北門

幅巾藜杖北城頭卷地西風滿眼愁一點烽傳散關信
兩行雁帶杜陵秋山河興廢客搔首身世安危人倚樓
橫槊賦詩非復昔夢魂猶繞古梁州

席上作

清波畫漿浣花船小簾疎簾角黍筵一幅葛巾林下客
百壺春酒飲中仙散懷絲管繁華地寄傲江湖浩蕩天
浮世升沈何足計丹成碧落珥貂蟬

送梅

零落梅花不自由斷腸容易付東流與人又作經年別
問月應知此夜愁已是狂風卷平野不禁橫笛起危樓
何時小雪山陰路處處尋香繫釣舟

醉中登避暑臺

半醉行歌上古臺
脫巾散髮謝氛埃
但知禮豈為我設
莫問客從何處來
剡曲烟波菱蔓滑
邪溪風露藕花開
老來世事渾成懶
一棹幽尋未擬回

病起

山村病起帽圍寬
春盡江南尚薄寒
志士淒涼間處老
名花零落雨中看
斷香漠漠便支枕
芳草離離獨倚闌
收拾吟牋停酒斂
年年觸事動憂端

臨安春雨初霽

世味年來薄似紗誰令騎馬客京華小樓一夜聽春雨
深巷明朝賣杏花矮紙斜行閒作草晴窗細乳戲分茶
素衣莫起風塵歎猶及清明可到家

聞猿

瘦盡腰圍不為詩良辰流落自成悲也知客裏偏多感
誰料天涯有所思漢塞角殘人不寐渭城歌罷客將離
故應未抵聞猿恨況是巫山廟裏時

芳華樓夜飲

射虎將軍老不侯尚能豪縱醉江樓笙歌雜沓娛清夜
風露高寒接素秋少日壯心輕玉塞暮年幽夢墮滄洲
人間清絕沅湘路常笑靈均如許愁

留題雲門草堂

小住初為旬月期二年留滯未應非尋碑野寺雲生履
送客溪橋雪滿衣親洗硯池餘墨漬卧看爐面散烟霏
他年遊宦應無此早買漁簑未老歸

十二日宿東林寺

看盡江湖千萬峯，不嫌雲夢芥吾胸。
戲招西塞山前月，來聽東林寺裏鐘。
遠客豈知今再到，老僧能記昔相逢。
虛窗熟睡誰驚覺，野碓無人夜自舂。

秋雨初霽戲筆

墨入紅絲點漆濃，閒將倦筆寫秋容。
雨聲已斷時聞滴，雲氣將歸別起峯。
斜日半穿臨水竹，好風遙送隔城鐘。
遠遊更動輕舟興，太息何人解見從。

七十三吟

七十三年事事新
涵濡幸作六朝民
髮無可白方為老
酒不能賒始覺貧
末路已悲身自客
此心猶與物為春
柴門勿謂常岑寂
時有鄉隣請藥人

泛舟澤中雨夜

無窮烟浪接空濛
秦望稽山醉眼中
虹斷已收千嶂雨
鶴歸還駕九天風
漁舟容與橫沙際
水鳥號呼傍葦叢
興盡還家忽三鼓
半輪殘月斗杓東

燈下看梅

風雨經旬却倚闌梅花接得就燈看有情應記去年別
無寐不禁清夜寒病起支筇幽興在春遲載酒後期寬
籬東數樹猶奇絕日遣蠻童候路乾

江樓醉中作

淋漓百榼宴江樓秉燭揮毫氣尚遒天上但聞星主酒
人間寧有地埋憂生希李廣名飛將死慕劉伶贈醉侯
戲語佳人頻一笑錦江城已六年留

寒食臨川道中

百卉千花了不存
墮溪飛絮看無痕
家人自作清明節
老子來穿綠暗村
日暮啼鴉隨野祭
雨餘荒蔓上頽垣
道邊醉飽休相避
作吏堪羞甚乞墦

成都歲暮始微寒小酌遣興

草帶頻移紗帽寬
茶鐺初熟篆香殘
疎梅已報先春信
小雨新成十月寒
身似野僧猶有髮
門如村舍強名官
鼠肝蟲臂俱無擇
遇友差能罄一歡

彌牟鎮早行

孤燈照影聽初雞攬轡情懷倍慘淒雪作未成雲意閉
郊荒無際客魂迷觸寒手指藏猶裂畏險圖書弃不携
老去有文無賣處等閒題徧蜀東西

涪州

古壘西偏曉繫舟倚闌搔首思悠悠欲營丹竈竟無地
不見荔枝空遠遊官道近江多亂石人家避水半危樓
使君不用勤留客瘴雨蠻烟我欲愁

枕上作

龍鍾七十豈前期矮帽枯筇與老宜
愁得酒卮如敵國病須書卷作良醫
登山筋力雖猶健閉戶工夫頗自知
今日快晴春睡足卧聽簷鵲已多時

小圃獨酌

少年裘馬競豪華豈料今為老圃家
數點霏微社公雨兩叢間淡女郎花
詩成枕畔常難記酒滿街頭却易賒
自笑爾來能用短只將眠醉作生涯

人日雪

病卧江村不厭深貂裘無奈曉寒侵非賢那畏蛇年厄
多難却愁人日陰嫋嫋孤雲生翠壁霏霏急雪灑青林
一盂飯罷無餘事坐看生臺下凍禽

秋雨

剡曲高秋一草亭雨來迨我醉初醒豪吞平野宜間望
亟打虛窓入靜聽沙上濕雲號斷雁籬根衰草綴孤螢
老人懶復親燈火卧看爐香掩素屏

秋雨北榭作

秋風吹雨到江濱
小閣疎簾晚色分
津吏報增三尺水
山僧歸入萬重雲
飄零露井無桐葉
斷續烟汀有雁羣
了却文書早尋睡
簷聲偏愛枕間聞

樊江觀梅

莫笑山翁老據鞍
探梅今夕到江干
半灘流水浸殘月
一夜清霜催晚寒
倚醉更教重秉燭
怕愁元自怯憑欄
誰知携客芳華日
曾費纏頭錦百端

梅花

月地雲堦暗斷腸
知心誰解賞孤芳
相逢只怪影亦好
歸去始知身是香
渡口耐寒窺淨綠
橋邊凝怨立昏黃
與卿俱是江南客
剩飲樽前說故鄉

射的山觀梅

射的山前雨墊巾
籬邊初見一枝新
照溪盡洗驕春意
倚竹真成絕代人
餐玉元知非火食
化衣應笑走京塵
即今畫史無名手
試把清詩當寫真

山行過僧庵不入

垣屋參差竹塢深舊題名處懶重尋
茶爐烟起知清興
碁子聲疎識苦心
淡日暉暉孤市散
殘雲漠漠半川陰
長吟未斷清愁起
已見橫枝宿暮禽

送陳懷叔赴上臯酒官却還都下

奇才初試發硎刀
疋馬秋風到上臯
地近雖同三輔重
時平無復五陵豪
極知穩步雲霄路
却要微知郡縣勞
歸去平津首開宴
吐茵應復忤西曹

雜興

散髮林間萬事輕
夢魂安穩氣和平
只知秋菊有佳色
那問荒雞非惡聲
達士招呼同嘯傲
福人分付與功名
一篇說盡逍遙理
始信蒙莊是達生

雪夜感舊

江月亭前樺燭香
龍門閣上馱聲長
亂山古驛經三折
小市孤城宿兩當
晚歲猶思事鞍馬
當時那信老耕桑
綠沈金鏤俱塵委
雪酒寒燈淚數行

憶昔

憶昔從戎出渭濱，壺漿馬首泣遺民。
夜棲高冢占星象，晝上巢車望塞塵。
共道功名方迫逐，豈知老病只逡巡。
燈前撫卷空流涕，何恨人間失意人。

夢蜀

夢飲成都好事家，新妝執樂雁行斜。
赭肩郾縣千筒酒，照眼彭州百馱花。
醉帽傾歌歌未闋，罰觥澣灩笑方譁。
霜鐘喚覺晨窗白，自怪無端一念差。

小雨極涼舟中熟睡至夕

舟中一雨掃飛蠅半脫綸巾卧翠藤清夢初回窓日晚
數聲柔櫓下巴陵

讀書

面骨崢嶸鬢欲疎退藏祇合卧蝸廬自嫌尚有人間意
射雉歸來夜讀書

文君井

落魄西川泥酒杯酒酣幾度上琴臺青鞋自笑無拘束
又向文君井畔來

花時遍遊諸園

為愛名花抵死狂，只愁風日損紅芳。
綠章夜奏通明殿，乞借春陰護海棠。

湖村月夕

客路風塵化素衣，閒愁冉冉鬢成絲。
平生不負月明處，神女廟前聞竹枝。

過江至蕭山縣驛東軒海棠已謝

星星兩鬢怯年華，幽館無人江月斜。
惆悵過江留一夕，

金瓶梅詞話卷一百七十五
曉風吹盡海棠花

叙州感舊

文章何罪觸雷霆風雨南溪自醉醒
八十年間遺老盡
壞堂無壁草青青

石倉歷代詩選卷一百七十五

欽定四庫全書

石倉歷代詩選卷一百七十六

明 曹學佺 編

宋詩五十三

范浚

遣興

商山園綺徒雪髮映松露山間謂終老不踏市朝路一朝前星匿羽翼起調護婆婆古衣冠笑定國儲副留侯

計偶爾曷遽動真素因知今昔士出處自冥數寧庸巧
馳驅失爾邯鄲步

題八駿圖

何年畫工搦毛錐貌此八馬姿權奇青絲絡頭十二蹄
調柔意態行愉怡五馬放浪無維羈或齷或望仍迴嘶
一牧牽鞵一牧騎製度彷彿唐巾衣不知此馬生何時
昔周穆王遠遊嬉駕跨八駿驅東西高升崑崙躡瑤池
騶駼驥義勞飛馳日走萬里無停驂興元唐家危累棋

百券僅脫朱泚圍黃屋進狩懷光追八馬入谷七馬疲
筋攣肉綻行人悲兩者資世皆顛羸虛名何有千載垂
空得傳記流歌詩未如此馬閒猶夷牧圻不受鞭箠威
不踣險遠安無危泉甘草薦足自肥安用號駿稱雲騅
嗟哉畫意誰能知

登富陽觀山亭

弭棹依寒渚臨亭俯碧川
嘶雲征海雁推鼓過風船
水濶天低樹山空日暝烟
擬題江似練終媿謝公賢

避盜泊舟武康遠光亭下與同行分和杜工部

詩傷秋及宿江邊閣

帶郭人烟少通村徑路微
水光浮棟宇野色動窓扉
小樹無重數前山不合圍
艱危隣虎窟奔迫詭牛衣
白舫竟何適丹楓看即稀
西園小茆屋知復幾時歸

次韻端臣姪喜雨

初弦落微月草宇夜岑寂
追涼拂桃笙曲肱聊偃息
檐榮忽飛雨散亂銀竹白
避漏起移床青燈暈空壁
曉看

蛙入戶時有燕為石是節正驕陽歆煩火雲赤煩蒸等
坐甑百體勞按抑良苗憂搞暴空有庭樹碧借免抱龜腸
猶應困蔬色炎埃今一洗萬井沐甘澤望歲即交歡
寧容須暇隙相逢如得酒酌飲莫餘瀝

偶作

宴食聊當肉緩步聊當車身閒貴莫比心足富有餘時
飲一杯酒歷觀千載書正爾良獨難亦復將何須

次韻茂永兄首夏新晴

燕落雨知節鳩鳴天欲晴行雲飛斷碧斜日漏微明
出竹三徑苗肥田一成野人知得飽索酒坐班荆

初冬郊行

空濶野雲踈行行思鬱紆露花啼晚菊風葉舞高梧
日落牛羊下天寒雁驚呼却回南澗路暝色徧蓬廬

雨後出郊

晴景收林靄春郊賸物華麴塵官道柳粉艷野塙花
竹裏草亭古沙邊苔徑斜遣心知有處發興渺無涯

其二

扶輿穿密竹度約過前溪霽色烟橫野春聲水繞畦映
山行白鷺遷木韻黃鸝客裏貪幽事歸時日已西

送周西美主簿之任祁門

君向祁山去修程幾日期江天梅子雨驛路槁花時知
迫循陔養寧辭糾邑卑美才無不適鸞翮豈棲遲

遊南山晚歸

樂事愜幽討閒情便舊遊梳風脩竹晚掛日老楓秋一

飽桑門鉢百忘塵世憂蕭條茆屋下可以縱冥搜

其二

荒荒日已暮迴首興何長擺種紛乾穗森疎嘯折筍水
枯山石露風晚野花香歸卧前簷下詩成小雨涼

春飲分章字韻

傳孟行美釀擊鉢課名章月借全窓白花分小樹香人
情歡子盡道術醉相忘雞黍襟期厚渠論漢范張

讀長門賦

阿嬌負恃顏姝好那知漢帝恩難保一朝秋水落芙蓉
幾歲長門閉春草自憐身世等前魚舊寵全移衛子夫
獨夜不眠香草枕東箱斜月上金鋪曉驚水巷車音近
失喜疑君枉瑤軫臨風望幸立多時却是輕雷聲隱隱
年年織女會牽牛百子池邊侍宴遊自從一落離宮後
無復穿針更上樓人言消渴臨邛客天下工文專大冊
黃金取酒奉文君冀悟君王賜顏色賦成果得大家憐
鳳背煎膠續斷絃不似昭君離漢土一生埋沒犬羊天

送徐彥思倅建安

君不聞詩人一席眠簷簷夜泊建溪微月中猶能即境
慰岑寂隔簾朗詠看瞳矐今君笑擁屏篴去早有繁花
明驛路脩程百越渺風烟發興自應多麗句知君踔越
是名流朱紱聊煩佐上州貳政少安山水國尋登要路
紆皇猷西風畧畧搖征旆過往題詩援離袂武夷鶴膝
杖扶羸寄我他時訪松桂

對酒分和杜詩

桃花朱李花白高柳花邊出多碧雨中物色更芳鮮
未礙劉郎中一石醺酣裁詩角險麗坐客豪宕成勗敵
但令得醉復長吟山雲從爾生虛壁

四月十六日同弟姪効李長吉體分韻得首字
黃梅雨歇春歸後博黍哺雛鳩喚婦紅殘小頰蹊上花
翠刷濃眉陌頭柳籜痕半脫烟篁瘦露裛幽香逗書牖
雲容漠漠曉陰愁麥信風前一搔首

題茂安兄藏春園

春入名園何處尋東風引步上嶠嶽平凝四面雲嵐合
曲折一丘花木深碧草華滋迷絕徑綠蘿陰影護芳林
韶光向此知歸處長與先生供醉吟

春雪晚晴出西郊

步履尋春犯雪泥村南村北鵲鳩啼墮梅殘白猶明樹
著柳暗黃初映堤風景快晴雲擘絮江天未暮日懸規
最憐碧漲侵沙尾更傍橫橋一杖藜

西園

路入西園綠苔間來倚杖一徘徊霜林有樹葉皆落
風榭無人花自開奴摘甘酸千百顆候梅蕭薄兩三栽
幽人自是便幽勝把酒孤吟只費才

四睡次茂載兄韻

門外啼鴉暗柳濃華堂翠幕度香風流鶯不識夢魂遠
自向窓前訴落紅

水亭珍簟卧瑠璃日暮涼生小雨催誰刺蓮船過前渚
榜歌聲落枕邊來

小窓卧冷聽吟蛩半擁輕衾乍怯風清夢不成空有恨
蕭騷疎雨打梧桐

暮春病起

病起春深白晝閒瓦松花老掩柴關坐調心息無浮念
沈水烟銷古博山